

CONSEJO DI MINISTRO DI REINO A REUNIRIBA HURAMENTACION NA ARUBA

ORANJESTAD (AAN) Pueblo sa awor cuant'or tin; parlamentarionan di Aruba a prefera di keda keto y no bay den un reunion publico pa atende e asunto di huramentacion di ministronan na Aruba, pa asina laga Hulanda su Consejo di Ministro di Reino dicidi riba e interes nacional grandi aki.

19 parlamentario di pais Aruba cu pueblo a vota pe, a laga pueblo na caya durante simannan cu a pasa pasobra nan a muestra pueblo bon cla cu nan no ta pone y nan no kier pone tampoco interes di pais Aruba na prome lugar y nan ta prefera di laga interesnan partidario y politico prevalece riba autonomia di pais Aruba, pa asina laga Hulanda dicta entrante ayera directamente riba autonomia di Aruba.

No ta importante mas ki decision Consejo di Ministro di Reino na Den Haag a tuma o laga di tuma ayera, riba huramentacion di ministronan na Aruba pasobra na momento cu Parlamento di Aruba cu mester a atende e asunto di huramentacion cu urgencia nacional a negligishabiertamente pa asumi nan responsabilidad y nan a scoge pa para deliberadamente pasivamente un banda pa laga Hulanda tuma decision, nan mes a percura pa nan no tin derecho di existencia mas den parlamento di Aruba.

E solo hecho cu nan a prefera di laga Consejo di Ministro di Reino na Hulanda reuni riba un asunto interno di pais Aruba, kiermen cu nan a entrega autonomia di Aruba directo na Hulanda.

Partido OLA no por a pidi reunion den parlamento si nan tin solamente dos parlamentario y reglanan di parlamento ta stipula cu mester tin un minimo di tres parlamentario pa tene un reunion publico y ta di con tabata asina dificil pa haya un parlamentario di MEP o AVP pa sostene un reunion publico?

Pueblo di Aruba a haya e muestra palpable cu politica partidista y di persecucion politico local pa saca probecho politico personal y partidista, tabata mas importante pa 19 parlamentario, cu e lucha di pais Aruba su pueblo votador pa nan mes determina ken ta bira minis-

tro.

E placa cu pueblo di Aruba mester paga tur luna na salarionan barbaro di parlamentarionan cu a sinta gaña pueblo cu nan mester di un aumento gigantesco pa asina garantiza pueblo un mihor gobernacion y un mihor salvaguardia di interesnan di pueblo basa riba supuesto profesionalismo, ta placa mal gasta y placa benta afor.

Ta cu tipo di profesionalismo asina cu ta costa pueblo miyones na salario, pueblo mester keda satisfecho cune, cu parlamentarionan a entrega autonomia di pais Aruba na Consejo di Ministro di Reino na Hulanda?

Ta pa un maneho entreguista asina di parti di parlamentarionan, pueblo a vota na december 1997, pa ayera pueblo bin haya e bofta historico den cara cu parlamentarionan no tabata tin e curashi y e grandeza nacional pa manera Arubianonan orguyoso para firme den un bloke, pa muestra cu

nan ta cumpli cu nan obligacion como parlamentario pa defende autonomia di pais Aruba?

Pueblo no a vota pa 19 parlamentario hinca autonomia di pais Aruba directamente den man di Consejo di Ministro di Reino y laga e organo aki bay dicidi o keda sin dicidi!!

Esnan cu ta kere cu un eleccion e aña aki mes lo bay duna nan ventaha o un victoria electoral, ta e hipocritanan mas grandi cu tin ta cana rond den e area di Caribe y America Latina pasobra na ningun pais den e region aki ningun parlamento a yega di entrega autonomia di nan pais na otro y pa despues kere cu nan por bay pidi pueblo voto den un eleccion, ta aki na Aruba so e hecho historico bergonzoso asina por a tuma lugar.

Cu tipo di politiconan asina den Parlamento pueblo no por spera nada otro den futuro cu bahamento di cabez y bringamento pa interesnan di partido, na lugar cu nan ta traha berdaderamente na interes di

e pueblo di Aruba.

Pa pueblo di Aruba no ta bale la pena mas pa sigui paga parlamentarionan y ministronan na Aruba un salario gigantesco pasobra tanto bal nan tey o laga di tey debi cu entrante ayera ta Hulanda a haya e oportunidad pa dicidi directamente pa Aruba y no cu politiconan y mandatarionan local por tuma decision.

Eleccion ta bale la pena pa tene?

Ningun Arubiano cu un solo cent preto di sinti den su cabez por bay vota pa 19 parlamentario cu a prefera di entrega autonomia di pais Aruba y riba dje kere cu den un proximo eleccion nan por bay pidi pueblo sosten y voto.

Ta con mundialmente hendenan cu pasivamente y deliberadamente ta entrega autonomia di nan pais ta worde yama?

Pa bay tene un reunion di parlamento despues cu a laga ayera Consejo di Ministro di Reino na Hulanda reuni riba un asunto netamente interno di Aruba, no tin nodi y esaki lo ta mosterd na de maaltijd (caba di como Hotdog pa despues pidi pa ketchup) y tumamento di pueblo pa payaso!

O por ta asina cu nan ta spera cu e bestia grandi no ta come e Hotdog y cu pa dialuna ainda ta resta un pida carni pa pone ketchup riba dje?

Cu excepcion di esnan cu a para firme contra dominio colonial o den futuro un partido nobo cu hendenan cu si por yama nan mes Arubianonan cu ta firme para pa loke ta di Aruba, no tin ningun sinti pa bay eleccion y no ta keda nada otro cu bisa actualmente: Nos ta bek bao dominio colonial danki a parlamentarionan!

**TELEFONAN DI DIARIO
826747- FAX 828551**